

FJALA E DEPUTETIT ENKELEJD ALIBEAJ

E ENJTE 24 MARS 2022

Pikë së pari, ju bëj me dije ju dhe të gjithë publikut, në fakt, që nuk duhet të provokoni kurrë debate të natyrës së brendshme të grupit tonë parlamentar; e para. Është e disata herë që e keni bërë këtë gjë. Ndoshta ju mund të kërkonit të fitoni kredo politike, por kjo nuk ju ka hije dhe nuk i bën nder askujt. E dyta, për të gjithë qytetarët dhe për të gjithë kolegët e nderuar, të cilët nga ana ime kanë respektin maksimal, dua të them që familja jonë, Grupi Parlamentar i PD-ës, ka rregullat e veta, gjithsecili ka kontributin e vet dhe ka rregulla të përcaktuara në rregulloren e grupit parlamentar. Deputetëve, miqve të mi, kolegëve të nderuar, nuk u toleroj vetëm një gjë, që çështjet e brendshme t'i nxjerrim në mexhllis; nuk është e hijshme.

Megjithëkëtë, në mbledhjet e grupit parlamentar, ku jemi të gjithë së bashku, i kemi të gjitha mundësitë për të bërë kërkesat dhe për të depozituar edhe kontributin tonë parlamentar, për të folur për çështje të rëndësishme, që u interesojnë qytetarëve. Megjithatë, sipas procedurës sonë të brendshme, sekretari i grupit u ka dhënë mundësinë të gjithë deputetëve anëtarë të Grupit Parlamentar të Partisë Demokratike të flasin dhe kanë gjetur mundësinë për të folur. Ky është rregulli ynë i brendshëm. Kam një kërkesë fare të vogël për këdo. Në një familje serioze, në respekt të njëri-tjetrit, i bëj thirrje nderit, respektit, njerëzillëkut mes nesh, që primare është që ky parlament, sidomos pjesa e djathtë e këtij parlamenti, ka synim kryesor mbrojtjen dhe të jetë protektor i interesit të qytetarëve. Të mos biem në lojëra të vogla apo në kurthe të vogla, në qoftë se nuk e dëshirojmë një gjë të tillë, por të synojmë pikërisht këtë: të mbrojmë interesat e qytetarëve shqiptarë me të gjitha mundësitë, brenda dhe jashtë grupit parlamentar, në parlament. Ky është synimi ynë.

Nuk kemi asnjë lloj kompleksi dhe asnjë lloj skenari. Kështu që, zonjë, kjo nuk ishte për ju, por meqë u ftova në këtë debat, po e quaj, ju, meqë jeni ulur në atë lloj pozicioni, ju lutem, mos krijoni hapësirë dhe mos krijoni asnjë lloj provokimi për të krijuar skenarë të tillë! Ju drejtoni punimet e parlamentit dhe nuk keni aspak të drejtë të filloni të gajaseni me situata të tilla. Ju lutem, seriozitet në këtë parlament, sipas Rregullores, sipas Kodit të Sjelljes dhe të fillojmë një orë e më parë me kërkesën që kam paraqitur në emër të të gjithë anëtarëve të Grupit Parlamentar të Partisë Demokratike, për mbrojtjen e interesave të qytetarëve shqiptarë! Faleminderit! Jam me shpresë se nuk do të përsëritet më ky skenar.